


# CELEBRACIÓN DO DOMINGO EN OS COTOS

5-6 de maio do 2018

## VI DO TEMPO DA PASCUA



OS COTOS COA IGUALDADE VERDADEIRA DAS PERSOAS,  
CO POBO DE SIRIA QUE SOFRE UNHA GUERRA INJUSTA,  
COS REFUXIADOS E MARXINADOS DA SOCIEDADE  
E COA NATUREZA MALTRATADA POLOS INCENDIOS



## 1.- ENCONTRO DA COMUNIDADE

(tod@s de pé)

@ monitor/a está na sé

CANTO 🎵 n° 82 A Cristo cantamos

## SAÚDO DE BENVIDA

### *Celebrante*

Benvidos sexamos todos a este encontro. Reunímonos coma comunidade no nome do Pai, e do Fillo e do Espírito Santo.

Na vida hai tempo para aprender, e tempo para vivir o aprendido, ou mellor dito, a vida sempre é tempo para aprender, e sempre é tempo para vivir o que se aprende.

Iso foi o que lle pasou aos discípulos, pois o tempo no que compartiron con Xesús serviulles para facer seus aqueles consellos, ideas e reflexións do Mestre.

Esa é tamén a nosa experiencia cando estamos rematando o tempo da pascua. Ao longo destes días Xesús foinos amosando o seu xeito de sentir e facer, e agora facemos nosos eses seus consellos. Sementar paz, non calar á violencia, deixarnos levar da man do Bo Pastor, respectarnos nas diferenzas, e amar, é vivir o aprendido de Xesús.

O que El dixo e fixo, é para que a súa alegría estea en nós, e a nosa alegría sexa plena. Celebrámolo.

## ACOLLIDA DA AUGA

Fixemos memoria do noso bautismo na celebración da vixilia pascual. Alí compartíamos a auga de toda a comunidade dos Cotos, e agora aquí ante esta auga de vida que nos une en parroquia, queremos lembrar os compromisos, queremos sentirnos confiados en Deus.

El é un Pai que nos acolle coma os seus fillos, queremos deixarnos bendicir agora coa vida coa que nos agarima.

*Achegámonos e renovamos o noso confiar en Deus santiguándonos coa auga ou co xesto da aspersión*

♪ nº 81 *(pode cantarse A auga do Señor)*

**Celebrante** Agradecemoslle a Deus os dons da vida cos que El nos agasalla, e facémolo dicindo

BENDITO SEXAS POR SEMPRE SEÑOR

**Monitor/a**

\* Deus creador de todas as cousas, que pola auga e o espírito, nos fixeches renacer á vida do evanxeo

\* Xesús, Ti que convidaches á primeira comunidade a ser testemuña anunciando o evanxeo a todas as xentes

\* Espírito Santo, que fas renacer á Igrexa pola alento da Pascua, e que nos convidas a ser auga viva

## ORACIÓN PROPIA DO DIA

**Celebrante** rematamos a primeira parte da celebración orando, presentando a Deus as nosas preocupacións, tamén os agradecementos ás nais.

*(silenzo)*

Deus de misericordia, e cheo de amor, axúdanos a seguir celebrando dun xeito responsable estes días de alegría en honor a Xesús, o Resucitado.

Que practiquemos nas obras o que celebramos na fe, tendo sempre un fondo agradecemento a todas as nais. Pedímoscho polo mesmo Xesucristo, que Resucitado vive e reina contigo por sempre eternamente. Amén

## 2.- PROCLAMACIÓN DA PALABRA DE DEUS

**(sentad@s)** a palabra de Deus proclámase dende o ambón

**Celebrante** Manternos unidos a Cristo é a maneira de facer crible a nosa fe, unidos a Xesús sabemos da responsabilidade de amar. Foi este o mellor dos seus consellos “amádevos uns aos outros como eu vos ameí”. Non poden ser palabras baleiras, escoitémolas.

*No Leccionario B páxina 147*

**LECTURA**

**LECTURA DA PRIMEIRA CARTA XOÁN**

♪ nº 3 *Unha xuntanza de amor*

**SALMO**

*(en pé) No Leccionario B páxina 148*

**EVANXEO**

**PROCLAMACIÓN DO EVANXEO DE SAN XOÁN**

**(sentad@s)** gardamos uns instantes de silenzo para acoller a palabra no corazón

## PROFESIÓN DA FE

**Celebrante** Neste tempo da Pascua, deixámonos alumar pola luz da fe que recibimos no bautismo e proclamamos coas nosas voces o que pregoamos na celebración da vixilia pascual

♪ **SI, CREEMOS**

### **Monitor/a**

Credes en Deus, Pai e Nai de todos os homes e mulleres, que nos agarima coas súas mans abertas e cheas de tenrura?

**SI, CREEMOS**

Credes en Xesús Cristo, o seu fillo benquerido, sempre disposto a acoller e a dar unha man para mellorar a vida dos demais?

**SI, CREEMOS**

Credes no Espírito de Deus, que nos alenta esperanza para soñar con outro mundo máis acolledor, que nos alenta forza para berrar ante as inxustizas, que nos alenta amor para coidar da nosa Terra?

**SI, CREEMOS**

Credes na Igrexa, unha Igrexa que se fai crible en comunidade, dando unha man para facer do mundo e da natureza fogar coidado no que todos os homes e mulleres son respectados?

**SI, CREEMOS**

## (en pé) ORACIÓN UNIVERSAL

**Celebrante** *Irmáns e irmás, saíamos ao encontro de Deus e con Cristo Resucitado que nos convida á amar, recemos dicindo*

**Señor da vida, escoita a nosa oración**

### **Monitor/a**

- Lémbrate, Señor, da túa Igrexa nai, concédenos saber apreciar e valorar os distintos camiños para achegármonos a Ti, oremos
- Lémbrate, Señor, das nais de familia, as mulleres que portan o don divino de dar vida ao mundo, para que vexan recoñecidos os seus esforzos e desvelos, oremos
- Lémbrate, Señor, das nosas parroquias de Os Cotos, que saibamos vivir unidos a Ti, para poder dar froitos de xustiza e de paz amándonos uns a outros, oremos
- Lémbrate, Señor, das mulleres que sofren violencia, e que necesitan maiores e mellores xustizas, oremos.
- Pedímosche tamén Señor, para que todos os que viven vertendo bágoas de soidade e dor, sintan a man agarimosa de Deus que, co seu corazón de NAI, socorre a súa debilidade, oremos.

**Celebrante** *Quédate, señor, connosco, e non nos deixes da túa man, ti, que vives Resucitado por sempre eternamente, amén.*

### 3.- OS SIGNOS DA COMUÑÓN CON DEUS E COA COMUNIDADE

#### NOSO PAI

*Celebrante* Cando gardamos as palabras de Xesús permanecemos no seu amor, por iso agora, deixándonos aconsellar por Cristo, achegámonos coma fillos ao Deus que, como NAI, nos ama por enriba de todas as cousas

NOSO PAI ...

#### SIGNO DA PAZ

*Celebrante* Queremos deixarnos aconsellar por Cristo, queremos facer noso o seu mandamento “amádevos uns a outros como eu vos ameí”. Ninguén ten amor máis grande que quen ofrece aos demais o mellor de si mesmo. Ofrecemos agora as nosas mans para facer crible a paz.

*CANTO* ♪ *nº 36 Fagamos a paz irmáns*

#### COMUÑÓN

*Celebrante:* Pola man dos apóstolos aquela primeira comunidade botaba a andar sabéndose unidos e aconsellados polo mesmo Xesús.

Agora nós compartimos arredor dunha mesa, e comprometémonos, amándonos uns aos outros como el nos amou. Ditosos, nós, convidados a este banquete da Festa da Pascua do Señor.

*CANTO* ♪ *nº 55 No colo da miña nai*

### 4.- AVISOS E DESPEDIDA

#### ORACIÓN FINAL

#### *Celebrante*

Señor, que a mesa que temos compartido, nos alente no esforzo por guiar os nosos pasos polos vieiros do teu reino, dando froitos dabondo para os demais, e tendo sempre un fondo agradecemento a todas as nais. Pedímoscho a Ti que vives e reinas por sempre eternamente. Amén.

*Con Xesús Resucitado queremos poñer LUZ de vida na nosa Unidade Pastoral de Os Cotos, coas nosas xentes, aínda que ás veces nos sintamos esquecidos.*

*Con Xesús Resucitado queremos ser AUGA viva que farta as sedes de xustiza de todas as persoas que non son respectadas por pensar, crer ou vivir diferente.*

*Con Xesús Resucitado queremos ser PAN compartido arredor da mesa que nos fai comunidade, facéndonos cribles en Os Cotos e para toda a Igrexa.*

Que o Señor da PAZ, o BO PASTOR RESUCITADO,  
nos bendiga, †  
nos garde de todo mal  
e nos leve á vida eterna. Amén

*Avísase das misas (ver folla do mes)*